

tatis, caulinis oblongis acutè auriculato-amplexicaulibus, summis ad dichotomias supremas minimis setaceis, pedunculis sæpiùs arcuatis capitulo minuto 3-4plò longioribus, involucris biserialis breviter cano-tomentosi phyllis exterioribus paucis brevissimis lineari-setaceis interioribus præter indumentum dorso glanduloso-pilosis lanceolatis acutis demùm navicularibus extùs obtusè carinatis induratis, receptaculo glabro elevato-punctato, flosculis intense luteis involucrum breviter superantibus, acheniis brevibus rufis oblongis apice brevissimè attenuato-subrostratis pentagono 10 costatis costis 5 sub lente scabris, 5 intermediis minùs prominentibus, acheniis exterioribus curvatulis, pappo niveo deciduo acheniis sublongiore.

Crepis dichotoma Boiss. et Bal. in pl. exs. Orient 1854 N° 254.

Hab. rara in declivibus umbrosis ad vias circà *Smyrnam* cl. Balansa. Floret Majo et ineunte Junio.

Planta 6-9 pollicaris, folia radicalia cum petiolo $1\frac{1}{2}$ -2 pollicaria supernè 6-7 lineas lata. Pedunculi $1-1\frac{1}{2}$ pollicares. Capitula eis *Endopteræ asperæ* paulò minora brevioraque. Achenia tantùm lineam longa ea *Endopteræ Dioscoridis* referentia sed dimidiò minora. *E. Dioscoridi* characteribus arctè affinis quamvis caule foliis capitulisque minutis diversissima. Forsan cum eis *Crepidì* rursùs adsocianda a quâ characteribus carpiceis genericè vix differunt.

ENDOPTERA INTERMEDIA Boiss. et Blanche. (Sect. *Nemauchenés*.)

E. radice verticali bienni, a collo sæpè multicaulis, caulibus erectis procumbentibusque ferè a basi dichotomè ramosis infernè præsertim tomentellis, foliis radicalibus et inferioribus oblongo-lanceolatis acutè dentatis vel runcinato-dentatis cæteris integris basi acutè auriculatis lineari-lanceolatis, omnibus puberulis, pedunculis capitulo 4-5plò longioribus 1-2 squamulis linearibus obsitis, involucris biserialis brevissimè cano-tomentelli squamis exterioribus 5-6 lineari-lanceolatis brevissimis acutis internis lanceolatis membranaceo-marginatis præter indumentum dorso 3-5 aculeis subaduncis obsitis demùm induratis intùs concavis dorso incrassato convexis, receptaculo alveolato alveolarum marginibus fimbriato-setosis, acheniis marginalibus squamis involucris inclusis pappo brevi deciduo superatis basi subcurvatis lævibus subcom-

pressis obsolete striatis dorso obsolete facieque interiori manifestius carinatis, acheniis interioribus lævibus in rostrum eis subæquilongum scabrum sensim attenuatis, pappo albo persistenti rostro achenii æquilongo.

Hab. circâ *Beyrout* et in arenosis maritimis ad ostium fluminis *Bahr Aoulé* propè *Sidonem* cl. Blanche. Fl. Maio.

Planta ut ex speciminibus binis a me observatis videtur humilis caulibus decumbentibus semipedalibus brevioribusque. Capitula ferè magnitudinis eorum *E. Dioscoridis* a quâ acheniorum structurâ omninò aliena est. *E. aspera* præter notas ex herbâ et capitulis minoribus brevioribusque petitas egregiè differt acheniis externis planis intus in alam latam expansis, internis dimidiò minoribus costato-striatis in rostrum multò gracilius eis dimidiò longius abruptè abeuntibus.

CREPIS SARTORIANA Boiss. et Heldr. (Sect. *Hieracioides*.)

C. perennis acaulis radice verticali squamulosâ, foliis omnibus radicalibus rosulatis expansis parcissimè hirtulis glabrisve ambitu lanceolatis pinnatifidis rachide latâ laciniis irregularibus rariùs triangularibus sæpiùs elongatis lineari-lanceolatis setaceisque acutissimis aliquandò retrorsis terminali triangulari vel sæpiùs lineari-lanceolatâ elongatâ, pedunculis procumbentibus folia 2-3plò superantibus nudis, capitulis parvis paucifloris, involucri biserialis phyllis exterioribus paucis lanceolatis membranaceis interioribus infernè præsertim hirtulis nigricantibus margine membranaceis lanceolatis apice ciliatulis, flosculis aureis subtus rubellis, acheniis multistriatis vix apice attenuatis pappo niveo eis subbreviori superatis.

Hab. in pascuis montis *Olenos* Peloponnesi loco *Campos* dicto cl. Heldreich. Alt. 6000'. Fl. Julio.

Folia 1-2 pollices longa 4-7 lineas lata. Pedunculi 1-3 pollicares. Capitula eis *Cr. virentis* vix majora. Valdè affinis *Cr. robertioidi* Boiss. quæ differt rhizomate cæspitoso, collo valdè squamoso nec nudo, foliorum segmentis brevissimis. Ambo valdè affines sunt *Taraxacis brevirostribus* (*T. Bithynico* et *T. psychrophilo*) quæ forsàn aptiùs *Crepidi* adnumeranda erint.